



皇明開國功臣錄卷二十

定遠黃金

沈仁

徐禮

宋朝用子晟

徐司馬

謝彥

馮誠

陳疇

劉謙

馬鑒

胡泉子顯

蕭成

楊文

沐春

袁洪

沈仁一名友仁世濠州定遠東城鄉大洪山人當元
政不綱群雄並起癸巳年四月舉義於本縣豁鼻山
上淵潛城口夏家林往謁授領軍百戶擊椒山池河等
寨甲午七月取滁州陞長千夫乙未年充萬戶正月

克和州二月擊雞籠山版門等寨六月從渡江克來
石太平溧陽充總管丙申二月苗軍楊叅政來攻溧
陽出兵走之隨復其城六月克宜興廣德長興此據

神道碑按克廣德在丙申五月克掌印元帥丁酉四
克長興在丁酉三月與此不同

月克宣州懷寧戊戌十月徐達等復宜興以仁守禦
應援常州并守長興先是張士誠設詐動以金帛啖
誘我將士自仁之戌也謹斥堠嚴約束姑蘇餌我師
之計禁不得行數年威望甚著乙巳十月改除沔陽
衛指揮同知守禦丙午十一月以王文與誣撫連逮
得釋吳元年正月降羽林衛鎮撫三月陞寧國衛指

揮僉事其年十月

瑞征福建十一月至

寅帥師度杉關克光

月丁未師至邵武元

守將李宗茂以城降得將士五千四百餘人丁巳至

建陽守將曹復疇降廷瑞命仁守之未幾克建寧洪

武元年二月回京授流官誥宣武將軍守禦寧國五

月從大軍克中原取河北定北平明年調永平守禦

三年十一月授世襲誥五年十二月調大興右衛八

年三月調濟寧右衛十年十二月授廣威將軍十七

年十月璽書制諭陞福建行都司都指揮使十一月

授流官誥階驃騎將軍二十二年七月因何何保誣

撫連逮蒙 恩賜宥授僉都督致仕自癸巳至是前
後管軍三十餘年大小數十百戰身被矢石瘡痍不
知其幾中間所立戰功宏偉卓犖然每謙抑自持不
少於伐調遣參隨諸將悉出 廟筭不敢自以為功
上以是重之洪武二十七年 朝廷推恩諸功臣未有
第者與為第於其鄉有祖墓者與為饗堂其先應封
三代封二代者封復文諸金石遂厥顯揚凡是造第
樹碑悉有緡錄仁官至二品例得賜第立石封贈二
代賜鈔萬貫於定遠李家灣撥籍于官屋地四十餘
間為第宅復置饗堂于墓樹碑神道祖九一父百四

俱贈都督祖母尹氏毋羅氏俱贈夫人所以昭顯
國家褒恤之典至矣子二人長默廢疾次英早卒孫
一人理以祖貴延賞留守左衛指揮使

徐禮國初從征取江南郡縣定淮楚平蘇湖積有戰
功累官行中書省右丞吳元年北伐中原向山東破
諸州洪武元年克河南燕薊山西二年從取陝西鳳
翔鞏昌臨洮涇州進攻慶陽張良臣以兵拒戰不勝
禮從諸將合圍其城七月辛亥王保保部將韓札兒
攻破原州即鎮原州在慶陽府西二百里指揮陳壽等俱陷沒大將
軍徐達聞報與都督馮宗異參政傅友德議以驛馬

關當其衝

在慶陽府西南九十里

遣禮將兵守之宗異復與達

謀曰今大軍圍慶陽良臣雖困未能遽下保保欲為良臣聲援故令札兒攻原州欲以緩慶陽請得移軍逼關以扼原州彼無所施矣達然之宗異遂以其軍西臨驛馬關去慶陽三十里而軍與禮緩急相應札兒復攻陷涇州宗異追擊之札兒遁去宗異還屯驛馬關與禮協守時良臣窘於王師之圍保保等援兵為禮等所搃又不能至內外音問不通而糧餉乏絕力不能支八月癸未遂克慶陽

宋朝用濠之定遠人隱約田里抱負才器慨然欲自

見於當世適元政不綱四方騷動因竊歎曰國事如

此將必有真主受命而興乎歲壬辰聞

太祖舉兵遠邇咸附即偕其子國興及晟上謁時得叅

預謀議是年隨軍克濠州復征賈魯敗之即授管軍

萬戶甲午從克五河泗州盱眙等處授總管乙未又

從征克復和州渡江下來石太平遂攻溧陽丙申從

攻蠻子海牙水寨破陳也先營克復建康授廣德元

帥丁酉克宣州遂留守禦改授天寧翼元帥以年老

還建康國興以功授總管先歿于王事晟襲兄職累

從征伐有功己亥始代父為元帥朝用既以耄疾間

居每奮曰吾父子幸際 聖明開萬世太平之業惜
吾老不能效尺寸然猶有望於吾兒竭盡忠盡耳洪
武十八年乙丑卒 賜葬於聚寶門外雷家莊給賜
其家甚厚明年丙寅晟由山西都指揮使陞右軍都
督僉事朝用以晟貴贈僉都督階驃騎將軍後以晟
陞左都督封西寧侯宣德初始追封為西寧侯配陳
氏為西寧侯夫人子七人長國用早世次即國興次
國祥次即晟國興晟俱別有傳次昱任山西布政使
次曄次昱孫七人茂瑄瑜琥玘瑛瑾瑄府軍衛指揮
使戰沒琥附馬都尉尚安成公主瑛尚咸寧公主亦

授駙馬襲虜侯爵曾孫曰傑任指揮使曰備指揮同
知曰俊指揮僉事曰儼曰佑俱正千戶自古帝王之
興必有英賢為之輔翼然後戡定禍亂以成大業我
太祖皇帝當草昧之初膺受 天命龍興濠泗朝用以
虎負鷹揚之勇際千古興王之會戮力從征克淮西
而定有江左勲績茂著實

帝業所基雖弗克竟厥施而用世之志固已酬矣其亦
佐運之良將哉

晟字景暘朝用第四子元季我

太祖皇帝龍興歲壬辰晟隨父及兄國興來歸明年從

克濠州又從戰敗賈魯父兄並以功授萬戶甲午從
張天祐克五河泗州盱眙又並進總管乙未從

上克和州渡江下來石太平從克溧陽進攻南臺國興
戰歿命晟襲兄職丙申從攻陳也先水寨克之遂從
克南臺晟父陞廣德元帥丁酉隨父克宣州遷改父
為天寧翼元帥以老留建康晟從鄧愈克徽州受功
賞茂茂召入侍衛己亥襲天寧翼元帥庚子調征饒
州及江西諸郡以次平賜襲衣文綺命充統兵官平
諸山寨洪武元年克建寧遂留守禦新定官制實授
武德將軍建寧衛正千戶四年陞懷遠將軍建寧都

指揮使司都指揮同知冬召還陞江西都指揮使九
年調大同授龍虎將軍十一月調陝西所至治兵撫
民不嚴而肅十二年掌涼州衛十三年逐北虜至白
城獲其人馬甚衆十五年父病召晟還侍又三年父
歿既襄事復鎮涼州虜時數為邊患晟率兵討之追
至亦集乃之地斬其兒渠也速兒監等及其衆無算
餘悉生繫送京師又招降虜偽國公吳把都等萬八
千人而送其酋長工不谷兒等百五十人詣京師簡
其壯者補卒伍餘悉處之善地俾耕牧自便驛召晟
還京獎諭再四賜賚甚厚復鎮涼州十九年召還陞

驃騎將軍右軍都督僉事賜鈔文綺以其官贈其二
代仍鎮涼州二十三年夏遣中使就賜白金及鈔至
秋復三遣賜鈔文綺授制諭充總兵官征哈密里
破之哈密者去肅州千餘里虜所城也誅其偽王子
別列怯等三十餘人獲虜衆千三百人及金甲一銀
印二悉送京師所獲馬牛羊咸給將士二十五年復
充總兵官征罕東西番叛寇誅擒七千五百餘人獲
馬二千五百牛羊十萬遂還京師二十七年調中軍
都督府是歲虜寇遼東命充副總兵討之遇戰腦溫
江獲虜衆千餘馬倍之明年廣西賊諸寨連結為

亂命充右副總兵徃征之誅禽七千餘人賊平還京
又明年總羽林八衛兵徃平五開龍里十三洞之寇
三十一年率師城萬全諸衛歸三十二年出鎮甘肅
三十五年陞後軍都督府左都督永樂元年授平羌
將軍充總兵官仍鎮甘肅三年虜日益聚近邊屢遣
人諭以朝廷德意其酋長把都帖木兒倫篤兒灰率
部衆五千馬駝萬六千來歸邊境底寧事聞賜勅獎
諭命都督徐廣緒尚書趙珩持節即軍中封西寧侯
賜推誠輔運宣忠效力武臣柱國仍後軍都督府左
都督食祿一千一百石又二年以疾卒于肅州訃聞

天子悼歎遣官賜祭勅有司給傳還其喪明年夏至京
葬聚寶門外先塋之次曾祖某祖一公及父皆贈某
官曾祖妣某氏祖妣宋氏妣陳氏皆贈夫人配丁氏
許氏皆封夫人子瑄府軍右衛指揮使蚤卒琬駙馬
都尉尚安成公主永樂中襲西寧侯洪熙元年坐事
改命瑛駙馬都尉尚威寧公主襲西寧侯孫傑金吾
左衛指揮使偉羽林左衛指揮同知俊天津衛指揮
僉事儼與佐旗手龍驤二衛正千戶晟勲著國家貴
聯戚里慶澤被于後嗣名聲施于無窮固本於際遇
聖明千載之會亦必其忠義之行閱遠之樹傑能魁智

克勤始終有以逢承之矣夫豈偶然徼幸者所可擬

哉神道碑

徐司馬小字馬兒初為

太祖養子賜姓朱氏國初所克城池多用養子作心腹
與行官同守戊戌年十二月上自將取婺州明年
班師留常遇春守禦以司馬為元帥偕遇春守之甚
著威望後以功陞都指揮使俾復徐姓守河南洪武
十四年正月大將軍等征北邊三月命宋國公馮勝
往河南訓練士卒以佐征討四月遣使齎勅諭勝曰
今天象有警占在大梁當蚤夜謹畏王城內外護衛

嚴密馬步士卒各加訓練其在爾左右圍于手王府
有馬毋令牧於遠地當令兩軍守一馬軍皆須精銳
者但有異聞即乘馬至報爾就以此語都指揮馬兒
亦宜慎防察人動靜九月復勅諭勝及司馬曰天象
屢見不可不警大梁軍民雜處宜用撫安之今秦王
晉王還京宜選精銳將士嚴密宿衛王到之時宋國
公出迎則都指揮守城都指揮出迎則宋國公守城
指揮軍士以三之一出迎餘悉令城守爾其夙夜加
慎毋忽

謝彥字子起世為鳳陽縣於皇里人幼失怙恃鞠育
於外家因以孫為氏故元之季兩淮兵興彥募義
勇圖保鄉井歲辛丑秋七月乃將其兵南渡大江從
太祖破安慶克江州于時偽漢陳友諒盜名字置官屬
據為國都至是始奔武昌彥以功授義兵元帥癸卯
春二月由安豐進攻廬州九月拔荆衡歸峽等州乙
巳冬十一月取通泰州丙午夏四月徐宿濠泗穎五
州淮安高郵安豐三郡皆入版圖秋七月轉攻湖州
冬十一月圍偽吳張士誠於姑蘇明年丁未為吳元
年秋九月從大將軍破姑蘇俘士誠以功陞掌羽林
環衛賜良馬復從征山東克沂莒密州遂入青州走

故元平章擴廓帖木兒洪武元年戊申春正月

太祖即皇帝位彥駐軍東昌進階武畧將軍是年敗故
元平章俺普軍取河西務通州秋八月大將軍徐達
奉詔統兵攻北平彥與在行故元順帝既遠遁而燕
薊永平保定真定中山以次悉平遂乘勝取山西大
同太原二年己酉春三月西破潼關故元平章李思
齊棄輜重引兵奔鳳翔三月庚戌從大將軍駐軍陝
西列營長安城北平章王武率其官屬士民迎降夏
四月取鳳翔即迫降思齊於鞏昌遂破臨洮延安平
涼靜寧莊浪開成六盤等處而秦涇環三郡亦望風

而靡慶陽守將張思道率兵拒戰凡七閱月而思道
敗走彥從大將軍還軍臨洮會故元河南左丞擴廓
帖木兒來襲我軍彥復從大將軍亟與決戰既敗之
於臨洮復敗之於定西擒殲其將校驅殄其士卒無
算擴廓帖木兒引殘兵北遁四年辛亥夏五月調彥
守禦慶州陞應天衛指揮僉事進階宣武將軍五年
壬子春正月移守朔州從征和林六年癸丑秋八月
敗故元兵於朔州之北獲其將知樞密院張寶院使
哈喇以都叅政高惠并其部衆九年丙辰春三月進
軍寧夏殺乃兒不花于賀蘭山收其胡兒番婦駝馬

牛羊而還十年丁巳轉廣威將軍二十年丁卯特陞
僉前軍都督府事賜彩帛萬疋黃金百兩白金百兩
田地一區減獲數十輩命征討雲南廣西龍里諸部
二十二年己巳秋八月還朝賜以誥命授驃騎將軍
二十三年庚午奉詔往湖廣都司訓練官軍至貴州
置新添衛二十五年壬申更給新製之誥九月赴山
西籍民丁為軍置天成東勝二衛二十七年甲戌春
三月十二日

上御奉天門召彥懋撫之眷倚甚厚特賜犀帶命復其
姓為謝氏明日以其季子達入觀即除散騎逾月選

尚汝陽公上拜駙馬都尉有玉帶金帶襲衣勒馬之
賜長子忠復授興武衛指揮同知三十一年戊寅得
疾致政三十三年庚辰卒年六十九訃聞輟朝二日
遣官諭祭賜葬于京城桂山之陽祖原美父中善俱
贈驃騎將軍都督僉事祖母張氏母許氏俱贈夫人
妻邵氏贈夫人子三人忠階懷遠將軍世襲順木仕
達特進榮祿大夫孫十人自昔一代之興必有龐臣
頌輔瓌傑之材以翊佐昌運及夫功成治定而彛當
鐘鼎之銘河山帶礪之誓俾與國家相為悠久惟我
聖祖受天明命握乾符而起淮甸御寶曆而定萬方

豪傑貔虎之士應期而出以折衝禦侮而克戡多難
自正大統即論功行賞以報功德之臣至於位躋五
府終始哀榮而垂光史冊者蓋亦可數若彥以篤厚
之資勇果之藝盡瘁效忠而致位將領斬關陷陣塞
旗先登首馘之獻不可以數計至夫鳴劔伊吾之山
飲馬捕魚之海踐霜雪絕糗糧凍餒疲瘁皆身歷之
故能簡注

宸衷光承 天寵身居宥密子為倅馬享榮慶於考終
傳爵祿於永世豈偶然哉豈偶然哉 神道碑
馮誠字擇善定遠昌義鄉人父國用季父勝俱以至

正甲午伏羲歸

太祖從克滁和定江左國用帷幄翼衛有功授帳前總
制親兵都指揮使卒于己亥四月追封郢國公祭于
功臣廟勝襲兄職仍掌親兵以征伐大功佐成混一
洪武三年封宋國公同參軍國事食祿三千石誠生
至正癸巳南暮月父從征賴母樊氏鞠育天資淳厚
不群兒戲七歲居父喪稍長體貌魁岸動止詳雅人
知其為偉器洪武元年年十六

上以其為功臣子命侍 皇太子讀書大本堂自經史
以及兵法悉以授之穎敏強記篤好問學能為詩章

上大奇之曰是真將種也遂命習戰以備征討四年隨
勝守鎮定西從麾下兵取甘肅等處敗元將失刺朵
耳只八大兵于虎刺罕口獲人馬羊駝各數十萬進
拔肅州至赤磧及敗俞寶兵八年仍隨勝性大同征
元未下散不刺等地有功而回

上憫其勞特恩三擢為指揮僉事其年任金吾右衛調
西安後衛十一年調往荊州操練十四年正月故元
平章乃兒不花等寇邊從大軍北征四月至北黃河
夜襲灰山克之獲其部落人畜甚眾九月從潁川侯
傅友德西平侯沐英征雲南是冬克普定普安進捷

曲靖擒元將達里麻尋克雲南府十五年二月克大
理以功陞署雲南都指揮使司左封印是年九月雲
南諸夷復叛先是友德等既平雲南即分兵四出攻
諸蠻寨未服者雲南城守者少諸夷因相扇為叛謀
有土官楊苴尤桀黠給其下曰總兵官已領大軍俱
回矣雲南城可圖也糾集蠻眾二十餘萬來攻時城
中食少士卒多病忽聞寇至頗以為憂誠以孤軍嬰
城固守旋施樓櫓備戰具多置強弓弩於堦上賊近
輒射之往往應弦而斃俟賊少怠則出勁兵以擊之
賊不能攻遂為困城計會西平領驍騎萬餘來援至

曲靖先遣健卒潛入報城中為賊所得詰之曰總兵
官領三十萬軍至矣賊衆駭愕拔營宵遁走安寧羅
次邵甸富民普寧大棋江川等處復據險樹柵欲謀
再舉誠從西平調兵悉勦除之斬首六萬級生擒四
千餘人諸部悉定雲南復平二十年陞南京左軍都
督府都督僉事未幾領各衛官軍仍往雲南征討二
十一年三月平緬蠻悉舉衆號三十萬戰象百餘寇
我定邊自恃勢焰日肆跳梁遠近蠻夷陰相構結誠
從西平率精銳往擊之既與賊對壘誠以輕騎三百
挑之賊驅萬衆乘二十象來敵誠出一戰殺賊數百
入獲一象以還西平喜曰如此賊不足破也明日賊
悉衆出營驅百象結陣以待象皆披甲背負戰樓若
欄楯然挾大竹筒於兩旁置短鎗其中乘以標之勢
恃以張西平命我師多置火銃巨砲及神機箭分軍
為三隊誠領其前都督寧正領其左都指揮湯昭領
其右申嚴號令將士聽命皆奮勇而出陣既交彼象
在前列我前軍機發箭鋒星流烟飛鼓砲交作火銃
之聲如霹靂山谷為之震動象皆驚奔合三軍大呼
而塵戈甲憂擊塵血飛濺不移時賊兵大敗斬首三
萬餘級俘萬人生獲四十七象餘皆被矢如刺蝟以

死賊將乃斯郎斯郎埋冬中百矢殪象上餘黨走死
百無一還自是群蠻襲服平緬歲入貢賦不復反矣
二十二年陞特進榮祿大夫右軍都督府左都督鎮
守雲南二十八年正月二十八日卒年四十三訃聞
上為之震悼勅有司給傳還其喪賜葬鳳西鄉先塋之
次妻王氏誥封夫人子男四曰仁曰義曰禮曰智女
一卅韓王妃誠以英資夙閑戎略用之戰勝克懋武
功其佐西平平滇南尤為鴻烈著為詞賦咸有典則
平蠻等賦及雲南題
詠見於紀錄者可考蓋文武才也卒以名節自全為

皇明世將猗與偉哉

陳旺淮安桃源人國初從取淮西伐偽吳克平江轉
戰閩越繼征中原積有戰功由千戶歷陞浙江都司
都指揮僉事後陞中軍都督府都督僉事洪武二十
二年卒輒朝二日遣官諭祭喪葬所需皆官給之禮
從豐備云

劉謙廬州合肥在城左一廂人元季兵亂與兄友仁
各起土兵捍寇盜以保鄉井既而聞

太祖義師為衆所附遂與兄俱來歸命往長鎗謝元帥
下叅隨胡大海克取黟縣祁門建德等處招到元帥
葉公權馬國保汪君信羅友賢侯邦佐等授友仁中

軍左元帥府右副元帥總判仁安翼守禦太平縣與
雙刀趙對敵歿于陣己亥謙襲兄職征進饒州克猪
湖寨賞彩段二銀枕一八月征浮梁再攻饒州辛丑
三月革樞密院開設大都督府賞彩段四疋八月從
上征陳友諒拔九江偽都獲其糧馬取興國府石榴寨
八陣坡擄賞彩段五疋徇克黃梅廣濟十二月招安
江西賞繡段襖一壬寅調守江西從定康祝之變復
賞彩段癸卯三月調從征七月水戰陳友諒解豫章
之圍克復吉安俘獲元帥彭志臯官軍四千餘名招
徠安福州姚大膽高以介王明善統領元帥孫茂先

克復永新策應袁州甲辰征進萍鄉虎背寨茶陵州
調征湖廣岳州賞彩段五疋乙巳三月奉總兵官常
平章檄守禦吉安吳元年三月取回江西聽調除南
昌衛副千戶十月隨江西行省左丞何文輝征福建
洪武元年克建寧等處回京賞彩段三疋四月扈從
車駕幸北京陞河南右衛正千戶誥授武畧將軍閏七
月收信陽光石腦等寨克定王保保軍回衛賞彩段
六疋十月調守陝西授武德將軍賜誥七年陞廣武
衛指揮僉事授宣武將軍調守潞州八年授世襲誥
廣威將軍復有彩段之賜十年賜羅段表裏各四十

一年陞特進榮祿大夫中軍都督府左都督尋以疾乞致仕功成身退人稱其明哲後封流伯永樂十二年卒輟朝遣祭卹典優備子八人曰遂陝西都指揮使黑鹽井監辦洪武十八年往山西集民丁為軍於萬全立衛陞中府左都督曰遂散騎舍人帶刀侍衛餘悉有官孫女三長冊秦王妃次楚府岳陽王妃次宣廟妃曾孫政任都指揮玄孫寧平羌將軍後府左都督

馬鑑字希哲鳳陽壽州人前太保劉福通下同僉舊姓成以義事父成丞相母事成丞相夫人吳氏因隨

之姓成所生父諱德屋亡軍中母程氏亦早亡鑑生而精悍鷙勇甲辰年從龍濟江備役前驅姑蘇張士誠悉眾合圍安豐鑑隸大軍應援遂解其圍以功撥守武德衛從平江西鄧克明諸砦繼克安福乙巳正月克贛州降熊天瑞五月克襄陽還調振武衛十月從諸將控水陸軍規取淮東十一月克泰州通州丙午淮泗宿壽諸郡皆下遂命從伐張士誠克太湖舊館湖州吳元年隨大軍攻蘇州下之是年冬陞懷遠衛指揮僉事從征中原克沂州益都濟南棗州洪武元年克汴梁守禦授流官誥尋下懷慶潞州平陽

絳隰棗龍王砦二年從取陝西鳳翔臨洮慶陽等地
守慶陽連得定西王保保綴我師管調守寧夏改寧
夏衛指揮洪武四年征達達地方四月授世襲誥五
年以調守綏德六年開衛署事寧綏二衛皆兵燹流
亡之餘賴撫綏有道兵民按堵再從征沙漠九年于
可愛刺只等地方捕亡孽伯顏帖木兒等十一年夏
授世襲誥十五年二月以連年征傷令子替職十八
年冬朝京陞山西行都指揮同知二十二年二月陞
前軍都督府都督僉事階驃騎將軍授流官誥祖煜
父德皇俱贈都督祖母王氏母程氏妻王氏俱贈夫

人二十七年二月

建廣東公幹軍務五

月二十九日卒于

崇驛年五十六訃聞

遣官迎致其柩七月二十一日舟至南門

上為輟朝一日中使齋文往祭東宮諸藩府祭使相

望其長子綏德衛指揮僉事溥扶柩還葬壽州祖塋
西北鑑夙稟正性廉介自守馬蹄所到秋豪無犯故
死之日其家一貧如洗養母成夫人年八十卒鑑以
禮葬祭壹不用浮圖守定家法故也餘見墓誌

胡泉臨淮人元季江淮兵亂歲壬辰二月泉從郭千
戶於定遠充百戶癸巳十月揚州薛左丞并曹魯等

侵圍濠州甲午六月泉隨大軍殺退賈魯等軍追至
五河獲船二艘招軍三十餘名同郭千戶攻破泗州
七月郭元帥舉充千戶隨本官克滁州又隨郭元帥
策應六合舉充萬戶乙未閏正月同啞耿鎮撫裝作
青軍攻取和州招徠軍人二十餘名四月隨鄭總管
耿鎮撫克取真州殺賊數十人獲馬七疋六月二日
從大軍渡江克采石取太平七月同鄭總管克溧水
八月征溧陽丙申三月一日攻破陳也先營招勇士
三十餘名十日隨大軍克南臺獲白馬一疋俘軍士
七十餘人十七日同鄭總管破鎮江是年十月攻常
州丁酉三月克其城賞銀梳綵段四月從徐達克寧
國縣遂取宣州辛丑充管軍鎮撫八月

上征陳友諒諸將悉從泉隸徐達軍克安慶拔江州友
諒出奔九月破湖廣等處壬寅正月下南昌既而祝
宗康恭復叛四月從徐達擊走之復南昌七月同鄭
元帥守禦安慶甲辰八月援安豐大敗偽吳兵追奔
數十里遂同飛熊衛指揮王志守禦六安乙巳四月
實授管軍鎮撫丙午調征浙西陞管軍千戶吳元年
九月破蘇州擒張士誠賞綵段表裏四疋陞虎賁衛
鎮撫洪武元年二月陞溫州衛指揮副使守禦本月

改沂州衛二年三月調萊州衛守禦五月誥授明威
將軍三年十一月陞本衛指揮同知授懷遠將軍四
年七月陞定遼衛都指揮同知授制誥昭毅將軍六
年閏十一月調湖廣武昌護衛仍前職開設衙門造
楚王府王泉妹胡氏昭七年授制誥散官如前十年
五月命將前所授誥命進繳有

旨隨楚王鳳陽省親十四年四月隨王之國同子顯
陞辭命泉致仕顯襲都指揮同知獲衛管事依親聚
居埗心勇將軍世襲誥命十八年顯從楚王征討有
功陞都督僉事丁卯戊辰等年顯復以功封梁國公

請給誥券封贈父母洪武三十三年追奪革黨發臨
襄山安置三十五年泉卒于臨襄年七十八楚王遣
官迎柩還葬白石山永樂元年

朝廷遣禮部郎中司達諭祭建享堂樹碑卹典從厚
子一人即顯有傳孫善曾孫宣玄孫深世襲武昌護
衛指揮

顯泉之子勿隨父在軍中既長驍勇善戰丙午丁未
年泉征浙西攻蘇州顯預有勞績復隨守備萊州定
遼等地洪武三年封楚王十四年四月王之國
上命顯襲父職都指揮同知武昌護衛管事十八年八

月隨王領軍征造古州銅鼓等處蠻峒十九年三月
全師回衛收集軍人一千五百餘名以功陞前軍都
督府都督僉事帶俸不與政仍侍楚王二十年十月
欽調統官軍討陸肇等處平之二十一年八月奉普
定侯調領官軍隨靖寧侯征東川龍海諸蠻部招集
軍士獲馬足數多克州城凡十有九珍寶貨貝悉獻
朝廷二十二年七月還師陞授特進光祿大夫柱國
封梁國公前軍都督府帶俸請給誥券出入朝禁者
十年三十三年二月有旨梁國公誥券拘入革爵
安置臨襄永樂元年五月楚王遣內官陸福奏母兄

胡泉子顯開廢臨襄原無公私罪過奉旨召回除
皇陵衛指揮僉事三年改鳳陽衛九月德州有功陞指
揮同知楚王復奏親戚指揮胡顯見任鳳陽其母在
武昌老疾乞令侍養遂得旨永樂十三年四月
十日顯卒年七十子善孫宣襲武昌護衛指揮同知
曾孫深由武昌護衛同知降調貴州都勻衛指揮僉
事玄孫雄

蕭成國初從征討積有戰功歷陞指揮參政等官天
下既定論功陞僉大都督府事更定官制改左軍都
督僉事洪武十六年春詔同魏國公徐達雄武侯周

武永平侯謝成鞏昌侯郭子興南雄侯趙庸永城侯
薛顯都督馬雲巡撫北邊訓練士卒冬十月遣使召
還京

楊文和州含山人父興國初從征克米石太平溧水
溧陽南臺鎮江常池通江等州歲癸卯與陳友諒鄱
陽湖戰歿甲辰以文管領本部神鎗李攻廬州乙巳
克贛州南康南雄隨湯大夫取永新虎皮寨丙午從
大軍征湖州舊館圍平江吳元年取小東破諸州洪
武元年克河南嵩州汝州懷慶澤潞平陽絳州太原
魯臺二年由潼關攻安西鳳翔秦州鞏昌臨洮西河

州蘭州原州慶陽三年除

皇陵衛百戶征進定西遇王保保軍擊敗之破其營落
自秦州南出一百八渡克復興元九月回京勅授承
信校尉四年閏三月調隸廣西都衛十月隨高僉事
征南寧宣化等處十一月攻那龍寨十二月至大小
安定捕賊同官軍克黃才高寨五年三月麓川賊叛
征克之八年十一月調桂林左衛九年正月屯軍陳
華四糾合獯人李季九等為亂即領旗軍直抵平樂
府谷塘等村勦捕之四月回衛閏九月復平象州武
仙叛賊十年三月攻龍神寨都教隘寨及太村十一

年陞六安衛右所千戶十二年陞本衛副千戶十四年六月隨安慶侯征討谷美等洞九月至五里洞等地悉收勦之十月回至常德又從征雲南十一月隨安陸侯攻破普定何買寨十五年攻西堡乾山寨五月領軍隨總兵官破普定容里硬寨七月克木岡許羅等寨八月開通關索嶺安籠青道路接應盤江十月克西堡的谷隴寨十一月克阿婆寨十二月克阿黑白崔羅師奄者鹿角寨十六年正月克阿窩寨三月攻七百房的窩寨七月又隨總兵克比納山寨十七年召赴京明年陞建昌衛指揮僉事二十一年二月調征祿肇翼子卜落瓦等蠻七月進討東川八月克百居寨九月攻土官攝賽住巢烏路寨前後斬獲無算十二月勦殺東川把事阿溪蠻人二十二年授世襲誥二十五年四月土官月魯帖木兒叛糾合各處土著西番摩些并土著官軍大肆殺掠文率本衛兵禦之賊攻城文督將士固守西門用矢石中傷賊衆遣千戶劉海領軍出南門與戰敗之賊復攻城復用砲弩擊射賊退月魯帖木兒安鐸忽樂等攻西門復以火銃擊之矢石交下如雨賊被傷死者五十餘人戕體面者尤衆賊首百戶也池不花等率五百人

攻上西門文命百戶張來興等出門與敵多所殺傷
又督令鎮撫裴慎擊賊獲其上城竹梯及木牌賊懼
五月一日悉奔走入山寨尋率所部與四川瞿指揮
使大軍克復里州立地里水二關安樂寨又領兵攻
破山狼賊寨生擒數十人斬獲首級馬疋數多七月
朔追月魯帖木兒至打冲河攻破土偏寨征哨德昌
克天星寨擒斬視前有加事平

上嘉其功遣官何濟召回京慰勞之陞右軍都督府都
督僉事賜誥階驃騎將軍子孫世襲指揮使二十六
年七月陞左軍左都督誥授特進榮祿大夫二十七

年五月奉制諭充總兵官率在京舟師鎮守太倉
仍督浙江都司沿海衛所船舶九月召回二十八年
正月掌中都留守司印五月命充總兵率馬步官軍
十五萬征討廣西時南丹奉議慶遠等處賊兵猖獗
故有是命十月師至其地克奉議向武都康富勞南
丹更吾蓮花大藤峽等關寨擒殺賊首黃世鐵莫金
等一萬八千三百六十八人賊屬男女八千二百八
十七口燒死者四百三十四招諭復業者六百四十
八獲銀印五誥命三馬騾五十九疋牛二千六百九
十六元糧二千六百九十三石築城開設奉議南丹

潯州慶遠四軍民指揮使司向武河池懷集賀縣四
守禦千戶所以鎮守之糧牛就給新立衛所收領屯
種二十九年二月班師三十年正月命往遼東操練
軍馬提調屯田七月驛召回京有

旨楊文充大總兵官掛征虜前將軍印率京師湖廣江
西等衛兵往征五開蠻夷大小官軍悉聽節制調遣
文統兵二十萬直抵洪州泊里福祿水從等九長官
司所屬上下南江迷洞皮林九層隆里上下中天府
等洞寨用機設奇擒殺蠻賊一萬九百三十三人賊
屬一萬六百七口招來天柱上下二洞復業民七百

八十三獲馬牛稻糧悉給新立銅鼓等衛公用是年
冬師旋明年五月命充總兵揀選北平行都司及王
府護衛精銳馬步往開平備禦閏五月召回永樂四
年正月四日卒賜葬含山縣梅山子和孫通曾孫廷
選世襲羽林右衛指揮使玄孫璽

御製征南詩賜楊文

大將南征膽氣豪腰懸秋水呂虔刀馬鳴甲冑乾坤
靜風動旌旗日月高世上麒麟終有種穴中螻蟻更
何逃大標銅柱歸來日庭院春深慶百勞
沐春字景春黔寧王長子生未暮母歿鞠於外祖氏

長歸就學洪武己未年十七即侍王考征西菴入
州擒元三副使明年從征以集乃擒國公脫火亦
歸又明年從征雲南歷功先士卒十六年還京師遂
掌禁旅冬江西寇僭號順天王扇諸郡作亂春與征
獨冒矢石奮勇先登殲之明年師還時雲南平留王
鎮守幾務之內馳驛再三所報悉稱 旨十八年秋
授驃騎將軍僉後軍都督府事廷臣請試職

上曰是兒我家人非他比也畀實授後軍轄幅員之北
視他府為劇春剖決如流事無壅滯是年冬繫天下
重罪於烈山春錄而詢之奏釋數百人十九年蔚州

民告變邠海等構逆 上命春馳驛往至則巡城厲
士襲而捕之推校得實白其誣枉又全活數百人二
十年從征虜大將軍宋國公帥師三十萬北出沙漠
勦元之餘孽未庭者次金山降其丞相開元王納哈
出俾朝京師春為護送納哈出與其屬見其威嚴甚
敬憚之二十五年王薨於雲南春往奔喪起春襲爵
誥曰曩命爾父副征雲南留鎮其地能布恩德蠻夷
率服朕無西南之憂者十有一年今命爾襲父爵當
思爾父相逢之幸忠誠為國夢寐存心則鬼神有鑒
福祿永昌矣春奉 上德意慎號令脩戎兵柔遠懷

通一遵父道謂屯政為要務較多寡之入嚴賞罰之
例穡功乃倍饋餉以足二十六年春緬國酋南速刺
來朝和泥祿谷為邊患遣元江刀平控禦之羅雄法
東嘯聚命都督何福征降之東川夷弗靖奏復攝寨
為知府境遂寧謐秋維摩阿的等十一砦構王弄山
撒哈諸酋拒命調都督瞿能聲討俘賊一千一十九
口斬首六百五十四獲馬五十二牛羊四千有奇皆
給戰士二十七年春越雋賈哈刺連西番釁邊出沒
北勝浪渠伏其要覆之擒斬二百四十三人請立瀾
倉衛鎮禦夏緬復獻方物秋施甸蒲阿董等衆犯永
昌命指揮使胡淵乘間出奇襲殺賊三百三十二獲
馬七十二衆遂披靡先是越州蠻龍海子阿資據龍
窩縱殺掠累為民害

朝廷命諸將率兵數萬征之師無功自後無敢議伐
者得肆猖獗春復討之衆以為難進兵紫溪山擒其
黨者宗及謀曰歷年不獲此寇者彼恃其地多險阻
及各處土酋皆姻婭得以匿之今調土酋悉從征設
謀羈絆俾不能通復多置營堡相犄角制其出入授
首必矣乃分駐陳寧逼之二十八年正月六日兵至
赤窩果獲阿資梟其首以徇及誅同惡沙陀普也等

二百四十一人土人震服阿資素號樂黠至是奏捷
上嘉獎之冬廣南酋儂真枯阻兵負固調都指揮王俊
征克之俘斬二千一百七人獲馬牛四百八十八疋
穀一萬一千六百四十石廣南通明年順寧酋猛丘
結外夷雲龍酋段羌納憲逃皆蓄異志遣大理衛指
揮使鄭祥往討猛丘懼而斃羌伏誅改立猛明段海
食其地寧遠州古為七十城門壤接交趾酋刀拜爛
恃遠不服命何福率兵一戰蠻臺江擒殺男婦二千
四百五十盡獲其乘象軍實酋懼乞降麓川宣慰思
倫發酌酒其下怨之三十年春刀干孟弄兵謀逐其
主以自立思倫發奔告援春與之入朝面受

宸筭以歸三十一年二月永寧卜八如加復通賈哈
刺寇邊調何福擒之戮其脅從俘獲男婦三百餘餘
黨悉潰三月春以思倫發之告駐師怒江諭刀干孟
釋兵不聽四月乃戒何福瞿能率勁卒八千嚙枚倍
道直擣刀干孟砦渠魁乘象突出追射殺之遂奮兵
縱擊大破其衆四萬餘斬首三千六百餘級獲象四
十馬一百五回擊景罕空蓬二砦皆下之時黨衆七
萬裨將請屠以逞春曰殺降不武乃誅其尤餘盡釋
之自是百蠻震懾不復携貳功聞授春以征虜前將

軍印命總四川貴州雲南各道兵欲盡平其地九月
十二日夜忽長星西墮有聲如雷春遂薨年三十六
朝廷震悼遣祭命官護喪回至京復遣祭者再謚惠
襄附葬王墓春天性孝友沉毅勇敢拒疑獨斷明識
絕倫在鎮七年增闢田六畝計三十萬五千九百八
十四益糧餉以石計四十三萬五千八百有奇復民
戶五千七百五十萬二千四百二十四又嘗鑿鐵
池河三十六里灌宜良涸田數萬畝民受其利云餘
定遠及雲南志

袁洪壽州安豐鄉三溝村人元季政亂天下繹騷有

好長鎗曰李中起淮楚間洪往歸之為其麾下萬戶
與同列九人皆以驍勇知名丁酉冬據睢陽因以其
衆來附得見

太祖於金陵

上嘉其能信任之初從越公胡大海衛

公鄧愈攻取州縣輒有功久之命隸曹公李文忠於
嚴州上若曰文忠朕勞也以其純謹可輔爾善事
之自是文忠所至洪必從行凡幕府之籌畫兵政之
約束進退之緩急賞罰之予奪洪必悉心以奉無有
懈怠文忠器之故於洪有婚姻之好焉己亥授右副
元帥甲辰陞左副元帥隊伍法行改浙東中翼右副

元帥凡用兵若克諸暨援嚴州取分水救廣信定婺州之亂解新城之圍皆預有議勞丙午十月文忠取杭州先桐廬洪分兵取富陽克之擒其同僉李天祿遂合兵圍餘杭守將謝五等全城歸順乃從文忠進攻杭州降潘平章得兵二萬糧二十一萬馬六百疋明年丁未轉翼為衛擢錢塘衛指揮同知洪武元年從取福建己酉征沙漠庚戌破應昌調濠梁左衛仍舊官辛亥遷濠梁右衛其年從平四川留守成都即陞成都衛指揮使甲寅召還京師改太原護衛指揮使丙辰擢晉相府左傳仍兼指揮使又明年開衛太

原右護衛兼左傳如故丙寅授山東

都司都練達兵

政

一

方庚午入僉後軍都督府事越三年癸酉實洪

武二十六年陞特進榮祿大夫本府左都督由懷遠

將軍歷昭勇昭武奉國驃騎四將軍遂至榮祿大夫

官階品級皆第一永樂初卒曾祖再興祖富父顯並

贈特進榮祿大夫左都督曾祖母楊氏祖母李氏母

楚氏並贈夫人妻孫氏累贈夫人繼室羅氏封夫人

子男長字榮祿大夫後軍都督同知次容駙馬都尉

進封廣平侯追封沂國公謚忠穆女長適楊實次適

李景隆次冊 韓王妃洪承先世種德委社于身起

擾攘之秋應風雲之會遭際

真主轉戰南北奮不顧死幾二十年道無險易無敢不
敬事無夙夜無敢不勤由卑陟尊屹然為朝之重臣
卒荷 寵靈克昌厥後於戲亦榮矣哉

皇明開國功臣錄卷二十一

定遠黃金

汪河

秦從龍

羅復仁

薛祥

范常

蔡哲

汪河

一作

龍舒人少有大志倜儻傑出嘗師武威余

文忠公叩其底裏其奧學雄文宏材遠略卓邁流革

元季政數江淮兵起四方紛亂靡所適從

太祖高皇帝渡江首被知遇用為行省掾史屢陳時務

上高其才識參謀幃幘贊畫兵政大有裨益辛丑三月

丁巳擢為大都督府都事出入左右數歷中外惟所

任使聲實以著元察罕帖木兒時克復汴梁兵威甚振及下山東遠迺震懾

上命河使察罕結接議論稱旨癸卯擴廓帖木兒察

之遣使尹煥章以書幣來通好上即遣河與俱往

答其意河至河南擴廓帖木兒拘留之時虜尚盛兵

中原上方有事江漢未遑讎較是年秋陳友諒亡

甲辰武昌平湖南江右諸郡咸附乙巳七月

上乃以書與擴廓帖木兒曰曩者初無兵端尹煥章來

得書惠綺即遣汪河同往為生者賀沒者弔安知去

而不回復遣人去皆被拘留且閣下昔與李羅構釁

雌雄未決尚以知院郭雲同僉任亮攻我景陵掠我

沔陽予思此城雖元之故地又在他人之手予從他

人得之非取於元也閣下外假元名內懷自造一旦

輕我遂留前使予雖不較但以閣下內艱未除猶出

兵以欺我使其勢專力全又當何如閣下果若挾天

子令諸侯創業于中原則當開誠心示磊落睦我江

淮今乃遣竹昌忻都率兵深入淮城殺掠人民殆非

所宜况有自中原來者備言張思道李思齊等連和

欲專併閣下此甚可慮之秋安不坐使西北數雄結

連關內反舍近圖欲趨遠利極力支吾非遠計也予

嘗博詢廣采關中軍將欲為亂恐不利於閻下故再遣人叙我前意達我所聞閻下其圖之節次使命若總遣回庶不失舊好惟亮察馬書至不遣丙午七月上復遣使以書遺之曰曩者尹煥章來隨遣汪河報禮至今不還予思閻下意當此之時孛羅提精兵往雲州與京師密邇其勢必挾天子閻下恐在其號令中故力競若歸使者必泄其謀故留而不遣閻下豈不知春秋戰國豪傑之士平世則講信修睦朝聘以時如季札至魯請觀周樂韓起來聘曰考周禮未聞有拘留之典也有事則遠交近攻合從連衡以卹隣國

以保宗社至於觀兵約戰使命往來猶恐後期相誤亦未聞有拘留者古人誠之相待如此惟春秋有鄭示絕於楚楚人執良霄漢累伐匈奴匈奴拘蘇武此夷狄報怨之淺見豈意閻下反效之予亦不以此介意予嘗言齊有十二山河桓公回之以九合諸侯秦有百二山河周漢據之以一統天下三晉表裏山河晉文以世主霸業幽燕北有居庸南阻三關天下都會此四要之地閻下無得而跨有之當留意於此閻下自以智高勢大傲然不吞亦不復於此留心方且千里裹糧遠爭江淮之利是閻下棄我舊好而生新

釁也兵勢既分未免力弱是以宇羅雖死亡餘孽跳梁於西北鳳翔鹿臺之兵合黨而東出俞實拒戰於樂安王仁逃歸於東齊幽燕無腹心之托若加以南面之兵四面並起當如之何此皆中原將士來歸者所說豈不詳於使臣往復之詞耶閣下拘留使臣果何益哉意者閣下不過欲挾天子令諸侯以效魏武終移漢祚然魏武能使公孫康擒袁尚以服遼東使馬超擒韓遂以定關中皇后太子如在掌握中方能偽定中原閣下自度能垂紳搢笏決此數事乎恐皆出魏武下矣且古之為國者不獨君能斷於上臣

亦善謀於下漢王在成羣待楚使以草具待亞父使以太牢從陳平計也禮雖有厚薄未嘗敢拘留也拘留之意雖出閣下亦可見謀臣又出陳平下矣事皆如此魏武之業豈得成哉儻能幡然改轍續我舊好還我使臣救災恤患各保疆宇則地利從可守後患從可緩為閣下利豈淺淺哉如或不然我則整舟楫乘春水之便命襄陽之師徑唐鄧之郊北趨許汝以安陸沔陽之兵掠德安向光息使安豐濠泗之將自陳汝擣汴梁徐邳之軍取濟寧淮安之軍約王信海道舟師會俞實同入山東加以張李及天保奴腹心

之疾此時閻下之境必至土崩瓦解是拘使者之計
不足為利而反足以為害矣唯閻下與諸君子同謀
之母徒獨斷以遺後悔書至仍不遣吳元年丁未春
上復遣使以書遺之曰自古有匡天下之志者必有容
天下之量而後能成安天下之功使其規模狹隘執
見不廣其為量也小矣又何能成安天下之功哉予
自起義以來拓地江右閻下之先以興復為名提兵
河北相去遼遠各天一涯繼聞先王去世閻下克
成其功且以尹煥章賫書致禮跋涉而來使予踴躍
興起乃知閻下能行先王未行之事豈不為之快
然用遣汪河致禮同往為死者弔生者慶初非無故
也今汪河去而不還予初不能無疑然久而得釋者
政以此時孛羅跋扈倒持國柄元之興替在其掌握
故閣下以靜御動一則恐起天下豪傑之心二則恐
出孛羅自為之後江河之留似有說矣茲歷歲久終
不見還乃知閣下執見不廣度量不弘何自信其始
而不信其終耶予請復以古人之事言之昔春秋之
世諸侯分治亦有以社稷為重生靈為念者故朝聘
以時會盟以道且如魯襄公即位之始衛使子叔晉
使知武子來聘襄公亦以季武子如衛穆叔如晉此

交好之間未嘗執其使者齊桓公伐楚楚使行人來
聘師乃次于陘此兵交之際亦未嘗執其使者古人
豈不思一介之使不過將誠道意所拘者小所失者
大也况閻下控守之地東連齊岱西拒秦隴北接幽
薊南抵長河地非不遠兵非不多所慮者張思道操
刃於潼關李思齊抗衡於秦隴俞實之兵蓄變於肘
腋王信之衆生釁於近郊恐閻下自以功成遂安如
泰山置之不問坐使諸雄連結禍機一發首尾莫救
此深為閻下惜也所以數四遣人奉書瀆聽者是予
欲盡一得之愚於閻下閻下何為自務拘使不答問
者禍起山東兵連秦塞幽并混撓鼎沸不寧此皆予
前日屢告之言為閻下今日明驗閻下何不取鑒焉
抑又聞古之立事業者必求士之多聞博學以廣其
才深謀遠慮以益其智今閻下用兵中原迄今十載
幕下豈無其人乎使其有人不知以衛晉之使於魯
也為何如魯之復命於衛晉也為何如設曰各盡其
禮則當磊磊落落竭忠言於閻下執此為法即遣能
使刻日將命以汪河錢禎等還豈惟不失前盟亦可
取信於天下使其不然是又開我南方之兵端為彼
後日之戰患初網日嬰惡貫日積強敵益增仇讎不

鮮閣下雖深謀如奔操詭計如懿溫英雄滿前何以
一取生功被天下守之以遜富有四海守之以謙况其
一為臣者乎閣下其深思之書至仍不遣是年冬十月
元罷擴廓帖木兒官奪其軍命諸將分統之擴廓退
居澤州洪武元年王師下河洛擴廓懼而西走定西
始以河還河自癸卯歲奉使被拘于陝右至是凡六
一年抗厲不屈完節來歸

上嘉重之即陞為吏部侍郎河備陳虜中事且上方略
擴廓竟由是取敗二年秋推陞為御史臺侍御史數
犯天威陞陳讜論內外諸政補益甚多九年

上以國之藩屏在眾建親王四月乙丑九子一孫同日
授封封晉王於太原控山帶河為韓魏趙之全壤地
大且要必簡朝之重臣為之傅庶以保王躬而制外
闡以河帷幄舊勳先使虜域忠節顯著繼在中臺功
業懋隆遂拜為晉王相親御便殿面諭而臨遣之俾
之先往繕城池立府寺備儀衛董官聯施政教以俟
王出閣河領眷命誓殫心力時天下初定兵戈甫戢
民力未舒晉又大藩百爾政務惟鉅惟艱河以身任
之成底成績其在王所也鞠躬盡瘁啓沃爾綸居數
歲晉大治河北以賢稱云夫人臣事君莫大乎忠義

忠義之士上通天道下察人倫而識其大者故其心
烈其氣嚴其節勁厲其行偉傑其身殉國不攜貳於
禍患不怵迫於威武是故軍旅不辟難朝廷不諛君
遇事變不偷生使強國不辱命方擴廓帖木兒遣使
通好汪河報聘為擴廓者敬遇之可也亟歸之可也
審圖而徐遣之亦可也顧以梟獍不義之情肆為執
留禁閉之計當是時虜兵橫鶩南北勢均以匹夫而
罹其患非有貫日之忠抗雲之節幾何不為其威惕
而力屈哉河則握一乘貞誓死守義頭可斷而志不
可奪歲愈遷操愈固雖臨武之寓匈奴洪皓之在金

國其凌奮激烈亦不是過忠肝義膽簡在

上心是以爵祿加於始還任用隆於益久蓋旌善以勸
天下其道當然也於戲水固宗海雖百折而必東臣
不負君縱九死而弗悔愚嘗竊論河之不屈於黠虜
也可謂識其大者其視廖楚公之不屈於偽吳也如
畫一後之讀其事者想其風槩猶自松粹壁真可敬
而仰哉

秦從龍字元之河南洛陽人初以才推薦仕元為校
官累官至和林行省左丞改江南行臺侍御史會兵
亂從龍以老避居鎮江歲丙申王師下金陵遣徐達

湯和下鎮江師行 上謂達曰爾往下鎮江有秦元
之者才器老成入城當為吾詢訪此人致吾欲見之
意達等至鎮江米得之從龍有從孫永時在達軍達
因遣還報 上喜甚即命兄子文正及朱文忠以白
金文綺聘之從龍遂與其妻陳氏偕來

上親至龍灣迎之以入時 上駐富民王絲帛家因邀
從龍同處朝夕訪以時事從龍皆盡言無隱既而
上即元故御史臺為府居從龍西華門外事無大小皆
與之謀每以筆書漆板問答甚密左右皆不能知嘗
稱為先生而不名每歲從龍生日 上與世子俱有

贈遺或親至其家與之燕飲禮待之甚厚乙巳從龍
從子澤死告還鎮江 上出郊握手送之是年十二
月病卒年七十餘 上聞驚悼時方督兵至鎮江親
至其家哭之甚哀命有司為營葬事厚賻卹其家
羅復仁江西吉水人少負奇氣言論敏捷初從偽漢
主陳友諒於九江為翰林編脩官甚見禮遇然醜友
諒所為不樂為之用歲壬寅

上兵至九江復仁因拔身來歸 上得之甚喜命左右
侍親任之癸卯從破友諒於鄱陽齎蠟書招諭臨江
袁州諸郡甲辰 上即吳王位除中書認議復奉命

招降漢主陳理於武昌擢翰林編脩洪武二年十一月戊戌特遣齎詔諭占城安南國王詔曰朕本布衣因天下亂起兵以保鄉里不期豪傑雲從數年之間土地闢廣甲兵強盛遂為臣庶推戴君臨天下以位正統于今三年海外諸國入貢者安南最先高麗次之占城又次之皆能奉表稱臣合於古制朕甚嘉焉近占城遣平章蒲旦麻都來貢言安南以兵侵擾朕聞之心有不安念爾兩國自古及今封疆各有定分不可強而為一此天意也况爾等所居之地相去中國越山隔海所言侵擾之事是非難知以朕詳之爾

彼此世傳已久保土安民上奉天道尊事中國爾前王必有遺訓不待諭而知者朕為天下主治亂持危理所當行今遣使往觀其事諭以畏天守分之道如果互執兵端連年荼毒生民上帝好生必非所悅恐天變於上人怨於下其禍有不能逃者二國之君宜聽朕言各遵其道以安其分庶幾爾及子孫皆享福於永久豈不美歟詔至兩國皆聽命罷兵安南贈復仁以黃金寶貝等物辭不受三年六月遷至京言安南所饋其等物已卻之不受

上曰不受其饋是也累官至弘文館學士以老歸田里

賜玉帶襲衣名馬四年五月丁酉以疾卒復仁性率直每論事指陳得失無有隱避由是為

上所知待遇甚厚云

薛祥字彥祥世為廬州府無為州人祖景仁在元仕至帥府鎮撫父舜卿元季兵亂四海鼎沸絕榮進意祥乃載武弁擐甲超騎集義兵保障邑郡適

太祖高皇帝龍飛淮甸駐師和陽祥遂從俞平章內附扈蹕渡江時至正乙未六月也推其材能表為水寨管軍鎮撫越明年丙申克臺城己亥攻安慶壬寅下江西癸卯復廬州戰鄱陽得侍御黃船與議軍政

上語俞平章曰汝之功業非薛彥祥不能成就若大總兵攻浙上奪姑蘇下中原凡傳旨密報惟祥是命洪武元年漕運河南孟津上遣人謂曰聞有亡命者潛伏衝要恐來劫掠倘彼眾我寡罔輕敵時夜半抵蔡河賊果至祥諭之曰汝眾良善也值兵亂嘯聚情出不得已今

聖天子出矣汝等當順天命歸守家業樂安田里無累妻孥縱使汝有千人不過劫得千石我之所部不下二十萬餘待曉縱兵蒐捕汝眾何逃眾服其言而散上聞之大喜時祥患背疽上親視之亟命醫治願延

安侯曰薛彥祥之疾託在汝等慎勿令億且嘗言汝
歷多軍功當授武職而今用兵山東供億糧餉未得
其人汝相從於起事之初固有年矣簡在朕心若古
之蕭何寇恂匡弼漢室不絕糧道欲汝效之特詔授
中順大夫京畿都漕運使管長淮大河等衛官軍分
司淮安自揚至蔡達濟壩堰皆沙塞崩塌䟽通脩築
晝夜無息役使均平不施刑而衆懼不呵叱而衆服
雖勞不怨祥諭之曰爾等戮力官家我奏爾功必得
賜爾職衆皆悅從繼得論功授職者三十餘人時幽
薊初附官民當南遷者皆經淮安飢餒者食之寒凍

者衣之死者殯之四年辛亥滿考還京淮泗之民焚
香祝曰願公再來作我父母攀轅拒轍者遮道山陽
海州頑民作亂駙馬都尉黃琛調軍追勦俘馘萬餘
人皆有名號其誑誤連坐者率皆良民祥與駙馬會
問力排之曰無名號者不許妄指由是獲全首領者
甚衆感荷如天寫真生祠之而民相勸莫為惡以干
犯祥令如是者前後八年官府蒙其福利士民霑其
惠澤乙卯誥授工部尚書時太師李善長奏鳳陽宮
殿人匠屬鎮祥面折曰太師一言壞天下人若此恐
不利於子孫乃分揀交替不在工者并鐵石匠不罪

蓋蒙其奏活者千數人明年丙辰營謹身殿該部誤奏中等匠作上等

上怒有命將罔上者棄市俾丞相大夫皆不復請時祥在側遂曰奏對不實竟殺千人因抗言極諫得

令下用腐刑祥徐奏曰若是成廢人矣莫若杖而復工可其請遂不譴是歲改天下行省為承宣布政使司以北平為重邊特投資政大夫北平布政使北平屬縣有大興民多貧乏嘗有鬻子女者祥至即責問所屬知所自者以俸贖給主一切庶務嚴於責己薄於責人不尚華飾不妄取不作無厭事三年方面寧謐時宰不悅適天旱不雨罔以差役不均坐殿嘉興知府實十二年己未也明年庚申春姦臣伏誅罷中書陞六部即召祥復職冬官尚書

上謂曰姦臣每讒害汝汝何不言祥曰臣罔知所故又明年辛酉十月不幸旁累下杖竟卒配賀氏先祥卒至是合葬於江寧縣聚寶門外平岡原子四人凱能政宣俱遷謫於瓊祥質性仁厚直諫不阿能容人小過鰥寡孤獨無告者周恤無所吝金玉子女不義者絕不苟得峻刑酷法以為能者不忍聞荼毒糜爛以立功者不忍為不避鈇鉞以活人為心贊襄

聖天子之仁化實多然不能逃於儉人之禍者豈氣數
有素定歟要之功德聞望有不隨死而亡者載諸史
策行狀

范常字子權滁州人宋青山先生孟申孫也幼警晤
嗜學淹貫古今性夷粹無競急於行義鄉里咸重之
謂其有青山先生風至正甲午

太祖兵克滁駐蹕城中子權以文學聞即召見禮遇之

預典兵牘

凡軍機行文

從克和州乙未六月扈

蹕渡

江取太平丙申三月定建康皆預謀議自是下毗陵

一及取江南諸郡贊畫居多辛丑七月乙酉朔命為太

平知府既至募民種藝時兵亂後乏種官廩有穀數
千石常請於朝悉發貸之至秋大稔私庾既實官
廩亦充乃興學校延師儒民甚安之

上嘉其績召入為侍儀訪以時政及古今事宜常直對
無隱又嘗紀滁和事績至是上之

上大喜洪武元年四月癸亥擢為翰林直學士尋兼太
常卿時肇興禮樂講究設施常多預議無何以疾免
尋起為起居注復懇乞歸上重念其老疾許致仕

御製詩四章賜之縉紳以為榮未幾終于家子組行
脩潔官至雲南布政司叅政授亞中大夫時謂官稱

其才終于任從子震有材武從渡江多立戰功累官
至右軍都督府都督僉事後左僉洱海衛指揮同知
自有傳

蔡哲字思賢湖廣武昌人始仕偽漢陳友諒為御史

歲辛丑八月

上討友諒拔江州壬寅正月下南昌是年哲來歸授江
南行省理問陞右司郎中癸卯命往贛州招諭熊天
瑞天瑞遂遣子入朝 上嘉之擢中書省叅政時四

川明玉珍據蜀國號大夏玉珍死子昇立遣使來貢
丙午命哲報聘因挾畫史同往圖其山川險易以獻

此取道伐
蜀之張本

吳元年改授江西按察僉事陞浙江行省

叅政復入為中書叅政未幾出為福建叅政召為侍
御史洪武三年十月以所舉御史犯法為廷臣所劾
坐免官尋卒 上深惜之命賜棺歸葬鄉里夫以元
季之亂豪傑之士睥睨當世孰不欲依託得主然後
可相與有為如陳友諒兵強國富宜亦可以攬結士
心然從之者往往掉臂而去若羅復仁蔡思賢一為
其編脩一為御史清要罔比然一聞

聖祖平伐之義即擺脫來歸雖彼殊遇不足以羈其迹
美官不足以繫其心蓋二臣者上觀天命下察人心

灼知

聖祖為真主故去彼而就此由是建功立業卒成偉名此其識見超絕不可及已向使溺於所從而不知變則堂堂之軀適足以膏彭蠡之戰鋒否則亦鄂州之降虜耳安能善其後耶馬援有言非但君擇臣臣亦擇君其幾固如是哉

皇明開國功臣錄卷二十二

定遠黃金

張天祐 張應麒 施春 王敬祖 謝熊

邵成 張鑑 郭天祿 張德林 潘興祖

湯昭 朱懋 俞茂 王克恭 張俊

趙奎 顧成 周立 張勝宗 孫恭

張天祐臨濠人至正壬辰滁陽王據濠州天祐應之

太祖時在王甥館預掌兵柄天祐同事征討由是攻五

河徐州泗州及收諸山砦皆預有功歲甲午克滁州

乙未閏正月 上謀取和陽王命天祐趙繼祖耿再

成率兵以往再成戰不利衆潰會日暮收兵還天祐等知之適與元兵遇急擊之元兵大敗遂據其城元守將平章也先帖木兒乘夜遁去王聞再成敗復命上率鎮撫徐達叅謀李善長及驍勇數十人往進暮至和陽始知天祐等已破城據之使人呼天祐至左右一舉火 上免胄示之遂入乃與天祐等為城守計復擊敗元兵王遂命 上總和陽兵 上與天祐等議分甓和陽城計城廣袤為十分限以丈尺刻日各完所事是月元兵十萬來攻和陽 上與天祐以萬人拒之連兵二月及夏乃解去時元太子禿堅及樞密副使絆住馬民兵元帥陳也先各遣兵分屯新塘高望及青山雞籠山道梗不通天祐從 上率兵攻散之濠城舊帥孫德崖乏糧就食和陽因求入城假居數月王亦自滁至和德崖與王有宿憾聞王來恐難共處遂求去三月王卒德崖欲統其軍

上代其子辨之時 上方與元兵戰天祐等聞 上欲往不悅乃止時汝穎倡亂者杜遵道劉福通等自碭山夾河迎韓山童之子林兒為帝居于亳遣人詣和陽招諸將欲為己用諸將詰天祐曰公度自能率衆禦元兵乎不然公當往天祐遂往未幾天祐自亳歸

推杜遵道檄以王之子某為都元帥天祐為右副元帥上為左副元帥上曰大丈夫寧能受制於人耶遂不受天祐受之渡江取太平攻集慶為陳也先所賣兵敗而歿

張應麒國初從征取太平破敵皓丙申三月庚寅從克金陵上欲發兵取鎮江慮諸將不能禁戢士卒為民患及命徐達湯和應麒廖永安等將兵以往戒之曰爾等當體吾心戒戢將士城下之日毋焚掠毋殺戮有犯令者處以軍法達等及應麒頓首受命是月丙申遂克鎮江兵不血刃

上大悅自是凡有征伐應麒咸預多致成功或曰張應麒即偽吳

湖州守將張天麒愚按天麒丙午年王師攻湖州始出降即國志所載張麒興化人張氏之亂奮勇從義征伐有功洪武初授江西行省參政是已應麒自國初丙申已從征江左則非天麒明甚

施春滁州人英毅有謀膂力絕人甲午年本州歸附乙未扈蹕渡江拔采石取太平自是定建業下荆

湖還守豫章戰皆有功吳元年召至京師授懷遠將

軍同知天長衛親軍指揮使司事從大將軍徐達征

進中原明年克山東河南關陝諸郡直擣大興抵虎

北徂順永平等州又西至寧夏所至克捷累功至青

州都衛都指揮使調福建行都司都指揮使授龍虎

將軍二十八年二月卒于官年五十九是年冬附葬
鍾山之陰

王敬祖國初從征渡江克采石取太平收溧水等處
由百戶授總管丙申三月從克金陵破鎮江十月從
攻毗陵丁酉三月下之陞興國翼分院元帥五月常
遇春遣敬祖同興國分院院判趙忠率兵攻池州之
青陽縣蘄州徐壽輝將趙普勝出兵來拒敬祖以數
十騎衝其陣陣亂衆兵乘勝疾擊遂破之克其寨八
月取馬馱沙十月從常遇春取池州戊戌四月普勝
復陷池州從諸將援之十二月從

上親取婺州明年克諸暨辛丑破安慶克江州皆預有
功

謝熊國初從征克江南諸郡縣累官指揮副使繼以
收平江取中原征西有功陞至都督僉事洪武十四
年秋九月從征南將軍穎川侯傅友德右副將軍西
平侯沐英等征雲南由辰沅趨貴州克普定普安進
攻曲靖敗梁王兵數十萬冬十二月克雲南府友德
以雲南既平命熊領兵守之即分兵四出攻諸蠻寨
未服者雲南城守者少諸夷因相扇為叛謀有土官
楊直充桀黠給其下曰總兵官已領大軍俱回矣雲

南城可取也糾集蠻衆二十餘萬以七月某日來攻楊立等衆相與會於西北阿楊等衆相與會於東南合三十六營進逼城下時城中食少士卒多病忽聞寇至頗以為憂熊乃與都指揮馮誠等嬰城固守旋施樓櫓備戰具多置強弓弩於陴上賊至輒射之往往應弦而斃伺城少怠則出勁兵以擊之賊不能攻遂為困城計時英等駐兵烏撒聞之即選驍騎一萬還救至曲靖遣卒潛入報城中為賊所得詰之曰總兵官領三十萬軍至矣賊衆驚愕遂拔營宵遁走安寧羅次邵甸富民晉寧大祺江川等處復據險樹柵

欲謀再寇熊等佐英分調將士皆勦除之生禽四千餘人斬首六萬餘級諸部悉定雲南復平

邵成鳳陽人國初從舉義屢備征討克滁和二州乙未夏六月從渡大江克采石取太平收溧陽皆預有功授總管繼而元將蠻子海牙結舟師扼采石陳也先既敗其子兆先復屯兵方山丙申春二月成從攻采石砦擊走蠻子海牙三月復大破兆先營禽之尋定金陵下鎮江以功陞元帥夏五月攻宣州六月同元帥鄧愈統兵攻廣德路克之置廣興翼元帥府命成同愈以元帥守禦冬十二月長鎗謝元帥率衆來

冠成同愈出城奮擊俘其總管武世榮及軍士千餘人明年春二月張寇兵復來侵復擊敗之三月愈移鎮宣州成專戍又明年陞統軍元帥

張鑑淮西八至正末江淮用兵應募為義兵千戶以勇略過人超擢為元帥慨然有志於當世顧共事諸將皆不足與成功率千戶武德渡江轉戰寧國太平之地數年歎曰天生豪傑堂堂雄萬夫而乃用武無成事勢可知矣不早擇所依一旦與草木同腐豈不可惜哉乃與武德以丙申三月歸

太祖於金陵仍命為元帥握兵隨征九月從常遇春攻

毗陵將下會我青軍叛與敵合圍大將徐達於牛塘復從遇春援之明年丁酉三月克毗陵以功陞江淮分院副使五月與僉院何文政率兵攻泰興張士誠遣兵來救鑑遣元帥徐大興張林擊敗之禽其將楊文德等遂克泰興復攻泰州六月攻高郵十月從李文忠佐遇春等攻克池州戊戌三月取於潛昌化乘勝克嚴州五月敗楊左丞軍十月克蘭谿十二月從上親取婺州明年克諸暨攻紹興遂旋師

郭天祿鳳陽人國初從征扈蹕渡江克采石取太平丙申二月破敵砦三月克金陵下鎮江皆預有功

授管軍總管時常州已為張士誠所據

上與諸將經略浙右必自常始七月天祿從大將率師
攻之會我軍叛與敵合復從擊敗之自是冬十月攻
圍至丁酉三月城始下置常春翼命將守禦復置常
春分院以天祿為分院元帥協守之六月己未命天
祿與分院院判趙繼祖鎮撫吳良取江陰士誠兵據
秦望山以拒我師繼祖天祿引兵攻之會大風雨其
兵奔潰我師據其山翌日進攻州之西門克其城命
良守之先是士誠北有淮海南有浙西長興江陰二
邑皆其要害長興據太湖口陸走廣德諸郡江陰枕

大江扼姑蘇通州濟渡之虞得長興則士誠步騎不
敢出廣德窺宣歙得江陰則士誠舟師不敢游大江
上金焦是年三月耿炳文既克長興至是繼祖天祿
又克江陰二邑併為我有士誠侵軼路絕平吳之功
翟興於此矣

張德林鳳陽人有膽略善戰元末為義兵長歲甲午
太祖取滁州德林來附授千戶從克和陽取版門寨三
汜河扈蹕渡江克采石取姑孰破堅壘於方山定
臺城拔南徐所向有功授管軍總管丁酉三月克毗
陵陞江淮分院元帥五月從分院副使張鑑率兵攻

泰興張士誠遣兵來救德林麾衆奮擊大敗之生禽
其將楊文德等遂克泰興復攻泰州六月攻高郵州
十月繆大亨率師取揚州克之獲衆數萬戰馬二千
上以其地要害置淮海翼元帥府命德林同耿再成守
之威懾惠懷軍民輯睦

潘興祖國初從平江南諸郡縣積有戰功歷陞飛熊
衛指揮使誥曰環衛之司實居左右勳舊是任用表
勤勞具官某直而能容剛而不撓方渡江之伊始即
杖策而來歸奮前驅而擢彼南征列中堅而保茲東
土奔走禦侮蓋無戰而不從艱難備嘗斯有功而必

錄戎旃再典獎命荐膺綽有休聲既克副於望實証
加峻秩庶足展其威名督驍士總材官任良重矣訓
武經申兵法爾其勉之可授前職

湯昭淮西人國初從征積有戰功由統軍元帥歷陞
指揮同知洪武十四年秋九月從征南將軍穎川侯
傅友德右副將軍西平侯沐英等征雲南克普定普
安曲靖及雲南府十五年從克大理等處復定善闡
叛夷十六年陞雲南都司都指揮同知與都指揮使
甯三同心治政時邊鎮初設夷情向背往往猶有叛
者則出兵勦平之二十一年春正月平緬蠻結砦於

馬龍他郎甸之摩沙勒正率師擊破之三月賊復舉
衆號三十萬戰象百餘寇定邊欲報摩沙勒之役日
肆跳梁遠近蠻夷陰相扇動昭從西平總兵討之行
旬有三日抵賊營會都督馮誠一戰挫其前鋒獲一
象而還英即令昭等曰破賊之術多置火銃神機箭
分吾將士作三行伺彼象近則前行之銃箭齊發若
象未退則第二行者繼之第三行又繼之銃聲不絕
象必驚走然後以大軍乘之破之必矣明日分軍為
三隊其前隊馮誠領之正領其左昭領其右復申以
號令將士鼓勇爭進賊悉衆驅象迎戰誠首督砲銃
俱發象果驚奔即令萬衆齊入攢射之昭與正麾左
右隊奮擊三軍大鏖賊大敗斬首三萬餘級俘萬人
生獲四十七象餘皆中矢如刺蝟以死賊將刀斯郎
斯郎埋各中百矢斃象背餘賊奔竄山谷生還者十
不二三於是凱還所過城邑爭獻牛酒至雲南驅俘
囚於前整隊伍作鼓吹以入城百姓聚觀父老賀平
蠻者墳道自是百夷畏威不敢復叛邊境寧謐昭有
功焉後數年卒子弼任河南都指揮使有聲孫叔正
江西都指揮僉事充叅將總督漕運居淮安
朱懋濠州定遠人元至正間江淮雲擾懋奮起為義

兵帥首歲甲午率衆內附

上奇其材勇即授以千戶乙未取和州陞充萬戶從大軍渡江丙申下建康鎮江陞總管進攻常州及江南諸郡每戰必身先士卒冒險弗顧乙巳以屢功授常州衛管軍正千戶吳元年克取浙西破蘇州執張士誠而浙東福建以次俱定洪武元年三月陞建寧衛指揮僉事二年三月賜誥命授宣武將軍三年陞建寧都衛都指揮僉事九年調延平衛仍前職十八年以年老征創乞致仕上命其子勲襲職留懋待用二十年四月陞左軍都督府都督僉事階驃騎將軍

二十一年命往雲南邊界提調陝西各衛軍馬二十二年九月二十一日卒于永寧寓舍年六十六訃聞上命官歸其喪勲亦親往昇柩二十三年正月十八日賜葬江寧縣安德鄉陰山之原妻夏氏繼室曹氏子五人長即勲次杰次熊次煬次輝懋當元末之亂能以義舉兵志固已不小及得所附奮武效能身被甲胄十有五年手足膚革俱矢石劘然天相厥志所向皆捷以故卒建大功輔成王業雖古名將莫之過也其顯爵高位子孫世襲考終其年復何憾哉墓誌俞茂國初丙申從征江左定建業下南徐授總管從

鄧將軍破桐汭敗長鎗軍丁酉七月取休寧績溪乘
勝克徽州以功陞元帥戊戌正月從諸將攻婺源州
殺獲數千人戮其守將鐵木兒不花遂克之置星源
翼分院以茂為院判官三月取嚴州尋敗苗楊軍於
徽之烏龍嶺十二月從

上取婺州明年克諸全回援池州辛丑八月王師下江
州諸將分取江右九月茂率兵攻饒之德興取之未
幾招降饒州後克取浮梁皆有功

王克恭國初從定江左攻霅川舊館克睦婺諸全歷
陞元帥李文思鎮浙克恭隸麾下以勇略深見信任

辛丑援廣信禽獲甚衆壬寅浙東大亂從定金華進
擊處州癸卯敗謝再興於東陽甲辰冬陞興安衛指
揮乙巳春二月偽吳兵寇新城從文忠戡定之冬十
二月上命文忠規取杭州等處命克恭將兵屯於
潛為桐廬昌化諸軍聲援明年秋從文忠克桐廬富
陽餘杭及下杭州攻拔紹興吳元年從平姑蘇征方
國珍皆有功

張俊國初從征取青陽石埭旌德淳安於潛克睦州
浦江婺州諸暨由總管陞元帥李文忠鎮浙俊屬焉
壬寅金華處州之亂提兵應援癸卯四月謝再興以

諸暨叛降張士誠九月壬午兵犯東陽俊從文忠往
擊之丁亥遇賊於義烏與戰賊敗去追奔數十里乙
巳二月張士誠兵號二十萬寇諸全新城胡德濟遣
人告急文忠命俊與指揮張斌領兵出浦江為聲援
意賊必來文忠率師次浦江而賊專攻新城德濟復
來請援文忠遂率俊等遠擊賊衆大敗之於龍潭賊
兵死者數萬俊復與朱亮祖等合擊餘寇焚其營落
俘其偽官韓謙等數百人軍士三千馬八百足鎗重
鎧仗無筭捷聞

金彩段明年從文忠克桐廬取

杭州陞指揮

元年九月從朱亮祖率馬步舟

師討方國瑛克新昌天台台州黃巖國瑛遁海上十
月巳未進攻温州陣於城南七里方國珍遣衛兵拒
戰我師擊敗之破其太平寨追北至城下餘兵奔入
城俊復攻其西門徐秀攻東門遂克之獲其負外郎
劉本方明善已挈妻子遁去十一月從敗明善於樂
清之盤嶼旋師至黃巖國瑛及明善皆來降以功陞
指揮使

趙奎字思義全椒人魁岸有材畧歲乙未護 躡渡
江多立戰績授千戶尋陞總管鎮守宜興後陞天策
衛指揮僉事洪武四年征甘肅至倒馬關猝遇敵入

主帥而下咸有懼色奎率麾下奮不顧身擣其中堅
衆乘之殊死鬪敵人遂潰捷報

太祖大喜及凱還以功陞福建都指揮使授驃騎將軍
在官數年威名甚著後終于任

顧成揚州江都人至正丙申自本州歸附隨者林元
帥渡江三月充百戶從桑院判攻取鎮江又征朱州
判海舟中箭傷左膊十月攻常州弩射傷脛丁酉三
月常州平四月克宣州選充旅正六月克江陰戊戌
隨廖同僉攻通州授千戶己亥攻樅陽雙刀趙箭傷
左足征安慶江州池州庚子從徐達攻興國并城山

寨五月與桑院判龍江擊敗陳冠獲高稍船一艘馬
一疋賜銀椀一辛丑克安慶江州攻取陳冠八陣營
壬寅下南昌癸卯從徐達援安豐破呂左丞兵征廬
州鐵彈傷左臂賜米三石甲辰二月克武昌鎗傷右
臂弩傷左膝是年除鳳翔衛百戶克荊州衡州乙巳
五月從常遇春克襄陽十一月克泰州收馬邏港同
千戶劉人傑守禦興化丙午十月從徐達攻破舊館
十一月取湖州吳元年九月克蘇州弩傷左右手及
左足以功陞金吾衛副千戶洪武元年四月詔授武
畧將軍扈從

車駕巡狩北京閏七月陞堅城衛指揮僉事二年二月率師攻克信陽唐州興安光石腦玲瓏等寨七月賜誥階宣武將軍四年三月與世襲叅隨臨江侯陳德征西蜀至青川偽官丁平章率衆來攻擊敗之追捕潰散生禽吳太尉子九舍獲尉楊花子等二十餘人斬首一百餘級至隆安州賊首楊平章等攻羅江縣成引兵擊之禽吳三舍劉元帥等一十二人梟于軍前四月駐漢州與偽官戴丞相向知院等對壘六月十一日合戰賊敗走追至成都小東郭七月十一日戴丞相等以成都降復隨金都督回青川攻取丁

寇九月克保寧調守成都後衛指揮僉事六年二月領兵往重慶捕首賊王玄保禽偽萬戶李邦祖等并賊衆八年八月調貴州衛指揮僉事九年十二月狁狃作亂領兵攻瓮傍瓮捏等山寨生禽賊一十九人斬首三十七級十年正月攻洛邦寨二月攻洛河山及刺掌山箐三月攻黃絲山四月攻谷阻山蝦麻山白石崖紅邊山箐五月攻壁勞都鎮前後破賊巢生禽數十人斬首四百一十二級獲銅鼓馬疋數多招降山砦一十三處七月平西叛亂奉穎川侯委同指揮周成揚興統領官軍至鄧家壩克郎八保

寨營于楊場征哨三千八萬向家等砦招諭土官王萬全以明氏原授金牌銅印偽勅納款出降節次禽賊五百餘人獲馬五十五疋八月又克泥平乾溪等砦十一月賊衆攻圍垂西成引兵捕之賊逃敵殺軍人宋質夫馬成督所部奮擊自未至酉賊大敗生禽五人斬首九十六級功聞賜彩段五表裏十一年二月率馬步軍援黃絲堡殺賊一十八人梟以示衆八月授世襲誥進階廣威將軍時龍小思謀逆引兵直抵賊巢小思遁搜獲賊從龍猪狗等九人即往隴葬追小思至饒平遇賊阻道即麾衆圍本寨攻破之禽

二十三人斬首一百四級十二年十一月復捕小思獲從賊并伽梟令進營木瓜十二月八日抵猛藏卜空河遇賊拒敵生禽二人斬首七級復抵西園禽赤主債義空桶等十五人斬首四十八級獲鏢弩等器探得小思挈家遁往普定遂回衛賜彩段表裏各一十四年十一月奉征南將軍傅友德檄調隨征進遂克普定守禦從安陸侯脩築本衛城池十五年正月統領贛州等衛官軍征西堡斬首八百餘級生禽一百六十八人獲馬六十六疋賜彩段一表裏三月蠻賊四起為亂領軍於安莊殺賊七人四月二日接取

安莊據險百戶曹亮回城沿途殺賊二十三人獲馬
二疋明日賊犯東門殺賊四十九人又明日西堡賊
聚衆一萬五千餘人來攻城甚急成堅壁不動又明
日俟其怠將兵出北門擊之殺八百七十三人生禽
一十九人賊皆散走是月十六日從平涼侯征叛賊
阿哈等寨殺賊四十餘人獲馬牛數多二十九日攻
榜土五月一日領兵哨取軍糧賊兵阻道殺賊九人
禽六人十一日榜土賊聚衆攻營出擊敗之斬首五
十四級尋率衆圍落角當硬寨有募役賊來援追殺
數人六月四日攻破本砦殺賊五百五十人調千戶

鄧義攻西堡賊首阿黑寨殺一百七十人復攻破浦
則硬及倚渡歹麼硬二寨共斬首級一百七十功聞
上特遣奉諭謝榮獎諭有金帶金織文綺衣之賜陞普
定衛世襲指揮使十六年正月奉安陸平涼二侯調
攻破阿黑螺螂杞佬等寨禽賊九人斬首四百三十
餘級三月從平涼侯張都督破七百房遂破的窩的
弟的麼谷穰谷王白黑心著刺革等寨禽賊三十
名斬首九十八級獲馬一十五疋十七年九月率本
衛官軍曲靖聽調行次尾洒馬乃蠻迎降服辦糧馬
又於水木竹家寨置倉貯軍前所獲糧二千石十八

年二月賜鈔五百貫十九年十月奉頴國公調征阿
黑兀硬若賊逃敵殺賊一百四十餘人生禽二十一
人阿黑潛匿復遣鄧義及千戶李成王先搜捕十一
月於小西界阿回等營獲其妻子家屬馬足又搜捕
之於龍山箐遇賊與戰生禽一十一人斬首一百五
十九級二十一年八月統平越等衛官軍征平西不
奉賦役扒古谷勞金剛等寨斬首三百四十六級禽
獲強賊九十人男女二百三十馬牛數百復征晉安
九月授世襲誥階昭勇將軍十二月征預營叛賊禽
首惡嘗蓬典刑二十二年二月禽斬土官阿東三月

領兵勦募役叛賊阿宗破其後關禽賊二百四十二
人俘其二子阿累阿宜宗遁追捕至隴革伐聰可哥
等寨殺賊一百七十二人俘男女口七十七克平木
革阿勦扯等一十三寨攻圍至九月獲阿宗及妻余
合把事阿黑三人斬之二十五年三月入覲賜白金
四百兩鈔五百錠彩段二疋陞貴州都司都指揮
同知十二月統普定等衛官軍安順等州土兵征康
佐等長官司并九十九寨不奉賦役等蠻生禽首賊
安朵等五百四人斬首二千六百六十一級俘人口
二千七百五十四令副長官許福壽招諭民人居種

服辦糧差及康佐等司增秋糧三百四十石二十六
年二月統官軍土兵攻西堡阿老唐等洞不奉賊後
者生禽八十七名斬首一百三十一級俘人口二百
八十二累歲負欠秋糧三千六百餘石徵足三月授
流官誥鎮國將軍贈封父公妻二十七年夏西堡
長官司阿得等若長卜刺讚等不奉賊役聚眾三千
餘人作亂殺良民劫奪牛羊不能安業九月領兵進
勦生禽大若長阿都必莫牙等七十一名梟以示眾
斬首一千六百二十二級俘男女一千五百六十六
口紀功賜鈔三十錠二十八年八月土官阿傍作亂

統兵至西堡阿姜等處節調官軍攻破獅子孔白石
崖等若生禽賊二十三斬首二千一百四十六俘人
口二千一百五十七獲馬二十四疋糧三千七百三
十八石九月征都勻衛曹學等長官司亂首鐵梁等
營于西梁瓦村等處攻破潘臺谷勞搃安等若生禽
六百八十六人選精壯五百人京師斬首五千五百
八級悉梟于通衢俘獲男女四千六百五十九口稻
穀四千六百九十一石二十九年七月入京陞右軍
都督僉事十一月奉

制諭都督顧成充總兵官掛征南將軍印率貴州都

司軍馬征勦水西不納糧差民民居宗等十二月攻
破闊木剋宗那革賈毋龍等關及居宗等處白熟等
硬若生禽蠻賊八十人斬首三千三百八十六級獲
馬一百三十四人口二千六百一十四三十年七月
旋師至沅州有 旨五開 作亂顧都督且未可
回就將征南將軍印統率軍馬策應五開八月復奉
旨鎮遠衛賊聚集在臻部洞近興隆衛著顧都督
前云勦捕九月進兵破臻部六洞生禽蠻賊二百九
十四人斬首九百三十五級俘人口七百六十四馬
騾二疋十月調率貴州等衛官軍征榜懈米毫灣溪

舟溪萬潮等處蠻賊移咨副總兵程暹分領貴州諸
衛會合九江武昌等衛兵參隨 楚王勦捕天柱天
堂春花金井蒲頭大坪小坪等處生苗平之十二月
旋師會于興龍又咨暹征都勻衛合江州陳蒙爛土
長官司所屬蒙池攀丙苗歸等若不納糧差蠻民生
禽一百四十七人斬首一千二百三十三級俘男女
一千八十三口三十一年正月普定西堡等蠻為亂
征克西堡滄浪羊場洛么阿資朗阿姜等寨回軍貴
州五月新添洛角等蠻聚眾攻燒屯堡肆殺官軍又
咨暹征上臺洛角先金堵虎公勞等箐斬首一百一

十五獲人口二百九十七月五十月征平洲六洞等
長官司苗坡羨塘光金蒙臺等一百三十七峇及龍
里等蠻不奉賦役聚衆為亂者前後斬首二千八百
六十四俘獲人口二千八百五十二馬六十二疋其
王石雍郎剋渡等峇悉撫於業三十三年陞都督
同知三十四年陞右都督明年封鎮遠侯以老將復
於貴州等處累平蠻賊有功永樂十二年卒追封夏
國公子統襲晉定指揮使先成卒勇貴州衛指揮同
知孫興祖以晉定指揮使參隨征蠻屢著奇績襲封
鎮遠侯兩充總兵掛征南將軍印勅平蠻賊玄孫淳

溥先後襲鎮遠侯

周立濠州永豐鄉南八都一圖人元末兵亂鄉里多
從軍立亦棄家人業結少年學擊劍舞槊歲甲午

太祖駐師定遠立自濠來附試其武勇用備宿衛是年

從克滁州乙未克和陽授千戶扈蹕渡江拔牛渚

取太平攻蕪湖溧水連破於丙申三月從定金陵

下南徐陞總管攻毗陵取宣慰娶諸全援池州戰龍

灣克復太平破安慶擣江州皆有功癸卯甲辰彭蠡

武昌之役戰績尤懋陞管軍正千戶克廬州攻通州

下襄陽取淮東海安泰州陞指揮僉事伐張瑄誠取

浙西湖州克蘇州賜白金彩段洪武元年正月丁亥
置中山衛親軍指揮使司以立為指揮使從取中原
破西賊有功陞山西都指揮僉事十三年調陞陝西
都司都指揮使威名其著十五年卒子旻襲指揮使
降橫海衛僉事孫晟襲晟子暹子輔調蒙化衛指
揮僉事

張勝宗國初從取太平克金陵拔南徐授總管下毗
陵睦州婺州援池陽敗陳寇於龍濟復太平破安慶
擣江州皆預有功陞千戶癸卯鏖戰陳寇於鄱陽之
禁江滅之甲辰克武昌從取江陵益陽岳州潭州澧

州乙巳佐克襄陽攻湖南未附州邑歷陞指揮副使
丙午九月統兵討易華於湘鄉先是華據黃牛峰既
降而復其餘黨益肆剽掠潭湘民多被其害至
是以叅政楊璟命討而執之斬于市復從擊周文貴
於辰州等處屢敗之文貴遁入寶慶丁未從璟征廣
西洪武元年克永州靖江諸州二年十二月大賞征
南有功賜白金文幣三年冬陞指揮使

孫恭濠州定遠人意氣卓越喜兵善謀至正甲午夏
太祖駐師定遠恭自塔山歸附從克滁和乙未六月扈
蹕渡江拔米石太平丁酉下毗陵攻湖州廬州是

屢從征伐積有戰勲甲辰二月武昌平授豹韜營
軍副千戶調橫海衛乙巳七月從平章湯和克永新
丙午秋叅隨徐大將討浙西克昇山砦舊館湖州
丁未九月攻破蘇州論功賜彩段表裏陞羽林衛管
軍正千戶賜誥階武德將軍一月從征中原十一月
取沂州密州克益都守禦明年洪武改元七月陞青
州左衛指揮僉事授流官誥宣武將軍隨徐大將北
取長蘆通州八月庚午克元都改永清左衛僉事二
年六月隨總兵常遇春取大寧錦川上都九月孫都
督征進興和迤北勦夷虜寇恭在行三年從都督華

雲龍征雲州獲偽平章火兒忽荅右丞哈海又從李
平章文忠克應昌全寧虹螺興中收捕各山寨及征
三不刺川等地亦從文忠進兵四年三月授世襲誥
從淮安侯至雲州牙頭襲獲偽平章王僧兒僧家奴
直抵大石崖逐殺元相驢兒等軍旋師北平繼領官
軍口北招諭伯顏不花惠王， 顏不花儲王蠻子太
討三人并部下將士悉降五年曾國公征沙漠復從
深入和林可盪哈刺莽來極于土刺河擊虜北走同
何都督追至騁海六年四月征山後惠州錦川破松
柵塔等山砦降賊首偽侍郎白鴟于七年五月

錦川惠州搜禽亡命潛民遂回金都督征興中
川五鳳山等處撲滅祁太尉虜偽司徒平章賽因帖
木兒十一年授廣威將軍十三年十二月故元平章
乃兒不花率衆寇邊十四年正月從徐大將等往征
四月整兵出塞至北黃河虜手馘遁復從傅友德夜
襲灰山克之獲其部落人畜甚衆十九年二月召赴
京陞前軍都督僉事誥授驃騎將軍明年隨宋國公
帥師征納哈出由新開喜風口抵金山納哈出遁逐
至一迷河降納哈出十月六日還至京十四日病卒
上悼惜之遣官諭祭賜葬鍾山之陰恭善射引強發

百步外無不中愛惜士卒與同甘苦攻城破陣有功
輒歸主將貴至都府謙畏翼若寒士人以是多之
子禧二十一年襲驍騎右衛指揮同知二十五年調
會川衛孫旭襲調成都中衛同知曾孫閔襲成化初
自以功陞都指揮無嗣閔弟逖襲逖子輅恭玄孫也
成化十九年襲任指揮使

西



